



KEMENTERIAN KEMAJUAN
LUAR BANDAR DAN WILAYAH

TEKS UCAPAN

YB DATO' SRI ISMAIL SABRI BIN YAAKOB
MENTERI KEMAJUAN LUAR BANDAR DAN WILAYAH

SEMPENA

MAJLIS HARI POTENSI TABIKA KEMAS
PERINGKAT NEGERI KEDAH TAHUN 2017

11 SEPTEMBER 2017 (ISNIN)
WAKTU KETIBAAN : 3.00 PETANG

السَّلَامُ عَلَيْكُمْ وَرَحْمَةُ اللَّهِ وَبَرَكَاتُهُ

Terima kasih Tuan / Puan Pengacara Majlis.

KATA-KATA ALUAN

Assalamualaikum Warahmatullahi Wabarakatuh Dan Salam Sejahtera

1. Alhamdulillah, dengan izin Allah SWT serta dengan Inayah-Nya dapat kita bersama-sama pada majlis ini. Terima Kasih diucapkan kepada pihak penganjur, yang menjemput saya ke Majlis Penutupan Hari Potensi Kanak-kanak Tabika KEMAS Peringkat Negeri Kedah bagi tahun 2017.

2. Saya juga ingin merakamkan tahniah kepada Jabatan KEMAS di atas kejayaan menganjurkan Hari Potensi Tabika KEMAS tahun 2017. Syabas juga saya ucapkan kepada semua kanak-kanak Tabika KEMAS yang telah menyertai Hari Potensi pada tahun ini dari peringkat parlimen, daerah dan negeri. Setinggi-tinggi penghargaan juga kepada semua pihak yang telah memberikan sokongan dan kerjasama terutamanya kepada ibu bapa/penjaga, ahli jawatankuasa Tabika, Jabatan, agensi-agensi kerajaan dan orang perseorangan. Diharapkan semoga kerjasama ini diteruskan pada masa yang akan datang.

3. Saya merasa amat bangga dan gembira kerana pada hari ini bukan sahaja kanak-kanak Tabika yang mewakili Parlimen/ Daerah, tetapi juga para ibu bapa yang datang jauh dari seluruh pelusuk Parlimen/ Daerah semata-mata untuk bersama-sama meraikan dan menyaksikan kehebatan anak-anak masing-masing beraksi di gelanggang sukan sempena Hari Potensi pada kali ini.

4. Sesungguhnya saya merasa kagum melihat kebolehan kanak-kanak Tabika KEMAS menampilkan aksi dan potensi diri dengan penuh keyakinan. Sudah pasti ucapan terima kasih juga diucapkan kepada Pemaju Masyarakat atau guru-guru Tabika, para ibu bapa dan ahli jawatankuasa Tabika yang telah Berjaya mengilap potensi mereka dengan cemerlang. Teruskan usaha ini, bimbing dan asuhlah anak-anak kita dengan penuh kasih sayang. Semoga usaha murni ini akan berkekalan serta mencapai objektif yang disasarkan. Inilah anak-anak yang akan menjadi pewaris bangsa dan negara pada masa akan datang.

Para hadirin yang dihormati sekalian.

5. Pertumbuhan kanak-kanak seharusnya dikembangkan dengan pelbagai potensi dan tidak sewajarnya terhad dalam aspek pencapaian akademik semata-mata. Tidak dinafikan, pencapaian dan kecemerlangan akademik sangat penting. Namun, membekalkan mereka dengan pembinaan sahsiah peribadi serta memberikan

peluang kepada mereka menggilap potensi dan bakat terutama dalam sukan yang digemari amatlah digalakkan. Tahniah diucapkan kepada KEMAS kerana pada saban tahun berjaya menggilap bakat dan potensi kanak-kanak kita melalui penganjuran Hari Potensi ini.

6. Sukan merupakan kegiatan yang memerlukan kemahiran, ketangkasan serta tenaga, samada sebagai acara pertandingan, hiburan, aktiviti masa lapang ataupun untuk beriadah. Sukan bukan sahaja penting bagi melahirkan seorang kanak-kanak yang sihat, menguatkan otot dan tulang, tetapi juga dapat membentuk kanak-kanak menjadi seorang yang berfikiran positif, rasional, berkeyakinan tinggi dan tidak cepat berputus asa.

7. Malah melalui aktiviti sukan ini juga aspek psikomotor kanak-kanak yang melibatkan beberapa prinsip asas seperti kekuatan, kelenturan, daya tahan kardiovaskular dan otot, ketangkasan, kepantasan dan kelajuan akan dapat dipertingkatkan. Semoga melalui aktiviti ini kita akan dapat melahirkan anak-anak yang berdisiplin tinggi, tabah serta berani menerima kekalahan.

8. Harapan kita agar melalui acara sukan ini, bakat kanak-kanak kita ini akan terus dapat digilap dan semoga akan lahir atlit yang Berjaya.

9. Pelaksanaan transformasi adalah sejajar dengan aspirasi menjadikan Tabika KEMAS sebagai pilihan utama ibubapa dengan memberikan nilai tambah kepada silibus pembelajaran sedia ada melalui tiga (3) modul iaitu:

- i) Penghayatan Pendidikan Islam (PPI);
- ii) Pemupukan Semangat Patriotik; dan
- iii) Modul Keyakinan Diri.

Program ini akan menyokong kepada aspirasi kanak-kanak seperti yang dihasratkan oleh sistem pendidikan negara untuk melahirkan kanak-kanak yang berkemahiran, berpengetahuan, beretika dan kerohanian serta beridentiti nasional.

10. Mendasari hakikat itu, maka Pemaju Masyarakat Tabika KEMAS akan sentiasa diperkasakan melalui program latihan pemantapan tahap profesionalisme secara berterusan. Program Diploma Awal Kanak-kanak kepada guru-guru Tabika telah dimulakan sejak tahun 2006 lagi, hasilnya sehingga kini guru Tabika dan Taska Permata KEMAS mempunyai kelulusan Diploma dengan jawatan gred S27. Sehingga kini seramai 7,365 orang telah memiliki Diploma serta seramai 718 orang yang sedang dalam pengajian di IPTA dan IPTS tempatan. Menjelang tahun 2020 dianggarkan kesemua Pemaju Masyarakat Tabika memiliki Diploma Pendidikan Awal Kanak-Kanak.

Para hadirin yang dihormati sekalian.

11. Selaku Menteri yang terlibat secara langsung dalam memberikan Pendidikan Awal Kanak-Kanak melalui KEMAS, Saya amat berbesar hati dan mengalu-alukan penglibatan Ibu bapa dalam program Hari Potensi ini. Proses pendidikan seseorang bermula sebaik sahaja ia dilahirkan. Mereka ibarat kain putih yang menjadi tanggungjawab kita untuk mewarna, mencorak dan melenturkannya. Mereka adalah anugerah dan amanah dari Allah SWT yang perlu dijaga sebaik-baiknya.

12. Ibu bapa dan ahli keluarga merupakan pengasuh yang paling penting dan mempunyai pengaruh yang besar terhadap perkembangan sahsiah kanak-kanak. Sabda Rasulullah SAW yang bermaksud, "Setiap anak dilahirkan dalam keadaan suci bersih. Ibu bapalah bertanggungjawab mencorak anak itu menjadi Yahudi, Nasrani atau Majusi" (Riwayat Bukhari dan Muslim). Oleh itu, peranan mendidik anak-anak bukan sahaja tanggungjawab guru semata-mata tetapi adalah bergantung kepada ibu bapa itu sendiri bagi membantu pembangunan insan dan pembinaan nilai budaya dan moral anak-anak.

13. Pada asasnya, pembelajaran bermula dari rumah itu sendiri dan dengan itu ibubapa merupakan pendidik pertama bagi seorang anak. Kemudian, pembelajaran itu diteruskan di Tabika, pusat jagaan kanak-kanak dan sekolah rendah. Bayangkan dalam tempoh sehari hanya lebih kurang (5) lima jam sahaja kanak-kanak hanya berada dalam jagaan seorang guru, manakala tempoh 19 jam lagi adalah masa kanak-kanak berada dalam jagaan ibu bapa. Oleh itu, ibu bapa perlu menunjukkan contoh teladan yang baik di hadapan anak-anaknya agar mereka dibesarkan dalam suasana yang penuh kasih sayang dan harmoni. Luangkanlah masa yang berkualiti bersama anak-anak, bermain dan ransang daya kreativiti mereka untuk meningkatkan lagi imaginasi mereka.

14. Saya juga difahamkan selain acara pertandingan sukan kanak-kanak ini, akan disampaikan juga Anugerah Pemaju Masyarakat Tabika Inovatif KEMAS. Anugerah ini diberi sebagai menghargai sumbangan Pemaju Masyarakat Tabika yang telah berusaha gigih, berkorban dan memberikan komitmen berterusan demi untuk pembinaan modal insan yang unggul dan berkualiti. Sebagai guru Tabika anda telah melaksanakan tugas yang mulia dalam mendidik anak-anak bangsa dengan penuh dedikasi. Terima kasih dan tahniah diucapkan. Semoga anugerah ini akan menjadi pemangkin semangat kalian untuk terus berjihad dan mempergiatkan usaha dalam mendidik dan membangunkan anak bangsa.

15. Sekalung tahniah juga diucapkan kepada kanak-kanak cemerlang setiap parlimen/daerah yang turut menerima anugerah mereka pada hari ini. Andalah contoh generasi awal yang baik serta menjadi teladan kepada rakan-rakan yang lain, saya doakan semoga kejayaan anak-anak pada hari ini akan memberikan inspirasi untuk mereka terus maju sehingga dewasa kelak. Ingatlah anak-anak sekalian, kesempurnaan dalam pendidikan mampu menjadikan kita sempurna dalam kehidupan. Hormatilah guru, ibu bapa serta orang lebih tua dan semoga kehidupan anak-anak akan sentiasa diberkatinya.

16. Bagi mengakhiri ucapan ini, sekali lagi saya mengucapkan setinggi-tinggi tahniah dan terima kasih yang tidak terhingga kepada semua yang telah bertungkus lumus menjayakan program ini. Semoga kita semua mendapat rahmat dan keberkatan daripada-Nya.

Wabillahitawfiq wal hidayah, Assalamualaikum warahmatullahi wabarakatuh.

Sekian, terima kasih.